

Obraćanje novoizabranog člana Predsjedništva BiH Šefika Džaferovića na konstitutivnoj sjednici
Predsjedništva BiH 20.11.2018. godine
20.11.2018 16:08:05

Ekscelencije,
eminencije,

Članovi Predsjedništva Bosne i Hercegovine,
uvažene dame i gospodo,
poštovani građani Bosne i Hercegovine!

Pozdravljam vas s osjećajem velike časti što se danas nalazim na ovom mjestu u funkciji člana Predsjedništva – ali i još veće odgovornosti spram obaveza koje nas očekuju u vođenju naše države u narednom četverogodišnjem mandatu.

Prije svega, želim da zahvalim građanima naše domovine što su i na proteklim Općim izborima pokazali demokratski kapacitet.

Na nama je da brzo i efikasno uspostavimo parlamentarne veze na svim nivoima vlasti. Po mom mišljenju, to moraju biti programske veze satkane od, prije svega, pobjedničkih političkih stranaka koje imaju kapacitet da vladaju na svim nivoima.

Potrebna nam je široka i stabilna parlamentarna veza koja bi svojim spektrom – imajući u vidu razne nadležnosti raznih nivoa vlasti – pokrivala cijelu državu. Izborni rezultati pokazuju da je takvu vezu moguće izgraditi. Sve drugo je pitanje odgovornosti političkih aktera spram preuzetih obaveza. Vlast treba uspostaviti što brže, vodeći računa o cijeloj državi, i bez ikakvih uslovljavanja.

Dame i gospodo,

Dozvolite mi da se zahvalim članovima Predsjedništva iz saziva 2014-2018. koji su, uprkos brojnim izazovima, uradili mnogo u interesu Bosne i Hercegovine i njenih građana. Njihov doprinos naročito je vidljiv na deblokadi evroatlantskog puta naše države.

Pred novim sazivom Predsjedništva je prilika da na temelju do sada urađenog naša zemlja ubrzano krene u društvo modernih i prosperitetnih evropskih država koju ljudi ne žele napuštati, nego žele ostajati u njoj i ovdje graditi budućnost za sebe i za svoju djecu.

Da bi se to desilo, potrebno je da paralelno vodimo nekoliko procesa, a ključni su reintegracija zemlje i njena integracija u Evropsku uniju i NATO. Sve to mora biti praćeno ubrzanim provođenjem ekonomskih i društvenih reformi.

Ljudi u ovoj zemlji su umorni od beskorisnih i bespotrebnih prepirki. Žele da žive mirno, da odgajaju i obrazuju svoju djecu, da imaju sigurnost, socijalnu pravdu, nadu i perspektivu. Naša je dužnost i obaveza da im to omogućimo.

Za početak je potrebno da svi povedu računa o riječima koje izgovaraju u javnom prostoru. Od riječi i sve počinje. Teške riječi, uvrede i neistine koje se izreknu zahtijevaju odgovor. Onda na taj odgovor dolazi novi odgovor. Tako se stvara spirala koja proizvodi lošu atmosferu u kojoj je teško raditi. Nastaju vještačke krize. Investitori nas počinju zaobilaziti. Bespovratno gubimo vrijeme, umjesto da rješavamo stvarne probleme.

Ukoliko jedni prema drugima budemo nastupali sa uvažavanjem, čak i onda kada imamo različite poglede, ukoliko budemo vodili civiliziran dijalog, ukoliko budemo težili dogovoru o ključnim pitanjima, i budemo se zalagali za istinu i pravdu, onda ćemo biti u prilici da radimo istinski na reintegraciji zemlje.

Ta reintegracija podrazumijeva jednaka prava za svakog građanina u svakom dijelu države, bez obzira na njegovu etničku i vjersku pripadnost, kao i zajedničko djelovanje na ostvarivanju interesa države Bosne i Hercegovine. Uvjeran sam da ogromna većina ljudi hoće da živi u takvoj državi Bosni i Hercegovini. Ja ću se za takvu Bosnu i Hercegovinu zalagati.

Mladi ljudi odlaze u uređene i moderne evropske zemlje, članice Evropske unije. Taj proces možemo zaustaviti jedino ako i Bosnu i Hercegovinu nađimo takvom zemljom.

Značajni koraci na tom planu već su napravljeni. Bosna i Hercegovina se nalazi pred dobijanjem kandidatskog statusa za članstvo u Evropskoj uniji.

Svima nam je potrebno da dodatno ubrzamo evropski put naše zemlje. Ispunjavanje uslova za članstvo u Evropskoj uniji mora biti prioritet najvišeg reda. Veći dio programa nove vladajuće koalicije treba biti sačinjen od preporuka Evropske komisije koje smo dužni usvojiti u procesu pristupanja. Vjerujem da o tome postoji opći konsenzus u Bosni i Hercegovini.

Ukoliko sve ovo uradimo, onda i od Brisela možemo očekivati da nam da dodatni vjeter u leđa, brzim odobravanjem kandidatskog statusa.

Dame i gospodo,

u svim ovim procesima Predsjedništvo Bosne i Hercegovine ima posebnu ulogu i odgovornost.

Očekujem da ovo Predsjedništvo vodi odgovornu politiku koja se ogleda u kreiranju i održavanju političke stabilnosti.

Držim da će Predsjedništvo takvim pristupim poslati jasan signal svim institucijama na svim nivoima vlasti da i one imaju ozbiljan i odgovoran odnos u izvršavanju njihovih obaveza.

Da bi to bilo tako – i da bi se Predsjedništvo etabliralo u punom kapacitetu šefa države – moramo se dosljedno pridržavati Ustava, zakona i demokratskih principa.

Moramo – bez ikakve rezerve – poštovati i provoditi Opći okvirni sporazum za mir u Bosni i Hercegovini i njegovih 11 aneksa. Na to smo se upravo obavezali i davanjem sve ane zakletve. To podrazumijeva poštivanje i provedbu i Evropske konvencije o ljudskim pravima, i svih odluka međunarodnih i domaćih sudova, kao i svih ranije donesenih zakona i odluka.

Sve to je ono što se u našoj javnosti kolokvijalno naziva “Dejtonom”. Sve to je jedna cjelina i jedan paket. Ne može biti nikakvog parcijalnog pristupa. Sve se mora poštovati i izvršavati jednako i sa istim intenzitetom.

Svi – i bez rezerve – moramo biti opredjeljeni za vladavinu prava i poštovati kontinuitet donesenih odluka. To je temeljni princip pravne države. Donesene odluke institucija se moraju poštovati sve dok se ne donesu druge, a ne osporavati i dovoditi u pitanje. Funkcioniranje našeg sistema nije stvar stalnih i ponovnih dogovora, već Ustava, zakona i donesenih odluka. Ako smo jedanput usvojili zakon, onda se on mora provoditi. Samo pitanja koja nisu uređena ili ona koja treba mijenjati mogu biti predmet dogovora. Do tada, važe i sistem mora funkcionisati i niko ga ne može uslovljavati ili osporavati, jer bi to onda bila opstrukcija koja vodi u anarhiju.

Promjena političkog stava o nekom pitanju je legitimna, ali se donesene odluke i zakoni moraju poštovati i mogu su promijeniti jedino tamo gdje su i donesene.

Dame i gospodo,

Kada je u pitanju odbrana, moramo se založiti za daljnju reformu odbrambenog sistema u skladu sa NATO standardima i Pregledom odbrane koji je usvojilo Predsjedništvo u prethodnom mandatu. Oružane snage Bosne i Hercegovine moraju u svakom trenutku imati kapacitet da mogu izvršiti svoje zadatke i misije propisane Zakonom o odbrani.

Naše Oružane snage u najvećoj mjeri već primjenjuju NATO standarde. Uostvare u međunarodnim sigurnosnim i mirovnim misijama pod okriljem ove organizacije, kao i Organizacije Ujedinjenih nacija. Očekujemo da će uskoro biti aktiviran Akcioni plan za miranstvo Bosne i Hercegovine u NATO-u, kako bi se nastavilo sa reformama našeg odbrambenog sistema.

Osim evroatlantskog puta, kao našeg osnovnog vanjskopolitičkog cilja, za Bosnu i Hercegovinu su u prvom planu regionalna saradnja i odnosi sa našim susjedima. Potreban nam je dijalog u regiji. Brojna su otvorena pitanja sa našim susjedima. Ona se mogu rješavati jedino razgovorom. Predsjedništvo treba da insistira da se saradnja sa susjedima gradi na principima punog međusobnog uvažavanja i reciprociteta, te na poštivanju međunarodnog prava. Pri tome se strogo mora voditi računa o interesima i pravima države Bosne i Hercegovine, kao i pravima naših pravnih i fizičkih lica. Od naših susjeda tražimo samo ono što Bosni i Hercegovini pripada. Od toga nikada nećemo odustati.

Uz saradnju u regiji, Bosna i Hercegovina treba da nastavi graditi dobre odnose sa svim našim partnerima i prijateljima u svijetu, i sa svima koji poštuju našu zemlju i dobronamjerni su prema njoj.

Pred nama je mnogo posla, i mnogo izazova. Uvjerim da ovaj mandat bude upamćen kao mandat saradnje, dogovora, napretka i prosperiteta naše zemlje. Uvjerem sam da imamo dovoljno zrelosti i mudrosti da, uz Božiju pomoć, napravimo iskorak u tom pravcu – da uvjerim da se svaki pojedinac u ovoj zemlji osjeća komotno, da bolje živi, i da bude ponosan na svoju domovinu, Bosnu i Hercegovinu. Hvala vam!